

**REGIONAL NEWS BULLETIN**

*Regional News Unit AIR Aizawl*

**Date – 31/01/2025**

**Time - 7:30 -7:40Hrs**

**HEADLINES (MORNING)**

1. Kum 10 chhunga chhinchiah danin Mizoram school hrang hrangah kum 6 atanga kum 14 inkar za zela 95 chu school ah ziah luh an ni.
2. Central YMA chuan Assam Rifles in Aizawl khawpuia an ram an chhuahsan hunah mipuite tana tangkai thei tura hman anih theih nana hma la turin sawrkar a ngen.
3. Parliament Budget Session chu vawiin hian tan a ni dawn
4. US-a khualzin 60 phur thlawhna leh sipai helicopter insu avangin thlawhnaa chuang zingah dam chhuak an awm lo niin US President Donal Trump chuan a sawi.

<><><>

**ASER**

Kum 10 chhunga chhinchiah danin Mizoram school hrang hrangah kum 6 atanga kum 14 inkar za zela 95 chu school ah ziah luh an ni.

Annual Status of Education Report in ramchhunga school hrang hrang survey a neih atanga tarlan danin Mizoramah kum 2022 atangin zaa 98 lain sikul an kai a, kum 2024-a chhinchiah danin naupang kum 6 atanga kum 14 inkar za zela 98.7 chu zirna inah an hming ziah luh a ni.

ASER chhinchiah dan hian Covid-19 hripui len hnuah private school hrang hranga naupang lut te an tlahniam nasa hle a, private school-a naupang ziahluh zat hi naupang school lut zawng zawng atanga chhutin zaa 40% a ni.

ASER data atanga tarlan danin Mizoram zirna in hrang hranga zirlai ten kum 2022 atanga kum 2024 inkarah lehkhahu chhiar an tui thar hle a, Endikna hrang hrang an neih atanga tarlan danin Mizorama zirlai te chu arithmetic lamah thiam tak an ni tih hmuhchhuah a ni a, thingtlanga zirna ina zirlai za zela 53.3% ten chhiarkawp an zir tawh tura chhawp chhuah chu an thiam hle tih hmuhchhuah a ni bawh.

ASER report atanga tarlan danin naupang kum 15 leh kum 16 zingah za zela 15.3% in school an ban san a, hetihlai hian zima in hrang hranga zirlai te kal leh kal loh chhinchiahna atanga lan danin kum 2022 a zirlai attendance 84% chu kum 2024 ah 90.3% in a pung thung a ni.

ASER hian Mizoram District 7-a khaw 197 a survey hi neiin hetah hian in hrang hrang 4132 ah luh niin naupang 7483 te chu thu zawhfiah a ni a, naupangte hi a hranpa in kawm vek niin zawhna inang leh tihur inang chu an dawng vek a, heta tang hian rampum dinhmun thlirin Mizorama zirna in hrang hrangah hmasawna a awm zel tih hmuhchhuah a ni bawh.

**(DESK)**

<><><>

**KOLASIB**

Nasha Mukht Bharat Abhiyan Master Volunteer leh Nodal Teachers te tan Kolasib ah nimin khan training buatsaih a ni a. He hun hi Kolasib DC Pu Robert C Lalhmangaiha chuan a hmanpui.

Kolasib DC chuan, Nasha Mukht Bharat Abhiyan chu ruihhlo atanga zalen India tihna a nih ang takin ruihhlo atanga zalenna nei turin theihtawpin an beih a pawimawh a ni, a ti. Ruihhlo that loh zia sawi chhunzawmin, an nih tur leh an thlen theih tur ang chin pawh min thlen tir theilo tu a ni, a ti a. School naupang kalkhawmte chu zu , damdawi leh ruihhlo dang laka inthiarfhlim turin chah a. Pathian in Ama tana nung tura an duh ang taka an nun te hmanga ruihhlo that loh zia thehdarhtu ni zel turin a chah bawh a ni.

Nasha Mukht Bharat Abhiyan hi Ministry of Social Justice and Empowerment hnuai India rama ruihhlo umbona kawnga hmalakna pawimawh tak a ni a. A tirah District 272 first phase atan an thlang phawt a, Mizoramah chuan champai, Aizawl leh Kolasib te first phase ahian an tel a. Nikum khan District 100 belh leh in tun dinhmunah India ram pumah District 372 a huam a ni. District tinah hian DC theuhte chairman anni a, an hmalakna te hemi atana duan bik App ah Upload zel tura tih an ni bawh.

Nasha Mukht Bharat Abhiyan puala training ah hian St John Higher Secondary School; Hmarveng High School, Vengthar RMSA High School leh Govt C. Zakhuma Higher Secondary School zirlai naupangte leh sawm bik mi pawimawh te an tel a ni.

**(Andrew Kolasib PTC)**

<><><>

**CYMA**

Central YMA chuan Assam Rifles in Aizawl khawpui an ram an chhuahsan hunah mipuite tana tangkai thei tura hman anih theih nana hma la turin sawrkar a ngen.

Central YMA chuan thuchhuah siamin Mizoram sawrkar leh Assam Rifles hotuten inremna (Memorandum of Agreement) an ziah tawh angin, Assam Rifles-te chuan tuna Aizawl khawpui laili-a an awmna chu an chhuahsan dawn hnai niin a lang an ti a. Assam Rifles ten an chhuahsan ram chu mipuite tana a tangkai thei ang bera hman a nih theih nana hma la turin Sawrkar an ngen tih sawiin hun lokal zelah Mimal, Political Party, Kohhran leh Pawl hrang hrang ten mahni tana remchang lo zawng lo turin an ngen tih an sawi bawk.

Thuchhuah tarlan danin Assam Rifles ram luah chhunga mimal LSC nei engemaw zatin, mipui hmakhaw ngaia an LSC an hlan let chu lawmawm an tih thu sawiin LSC nei dangten ram leh hnam tana hlan ve turin an ngen tih an sawi bawk.

**(DESK)**

<><><>

## **PWD KAWRTHAH**

PWD, Kawrthah Division hnuai Zamuang-Hriphaw-Kolalian-Dullupcherra (ZHKD) Road, Kawrthah Sub-Division in a enkawl mek chu a thawmthat hna thawh mek a ni a. He kawng hmanthu khuaten complaint an neih avangin Taitesena Group YMA hruaitute, PWD Kawrthah Division hotute leh Contractor ten tunhnai khan a hmunah kalin an tlawh a.

ZHKD Road hi Kawngpui lun ve tak a nih avangin he kawng rinchhana eizawng, sumdawng leh mipui zin veivakten harsatna an tawh thin a, PWD lamin an theih tawkin thawmthat hna thawh thin mahse, mipuite beisei angin duhthusamin an siam tha thei lo niin kan corr chuan a sawi a, he kawng siamthat hna thawh mek hi, SASCI sum Cheng Nuai 500 hmangin Nikum atang khan PWD Kawrthah Division enkawlna hnuai hna thawh thin a ni a. ABCI Company ten Contract hna thawkin, tun Thal chhunga zawh ngei tumin ngawrh takin hna an thawh mek a ni. Tun tuma siamthat hna thawh mek hian Zamuang leh Hriphaw inkar kawng, (Kms 16.700) a huam dawn a ni.

Zawhna chhangin Kawrthah PWD EE Pu Lalduhzuala chuan Mipui harsatna sukiang tur hian PWD chuan theih tawp a chhuah reng a, rawtna pawh kumtin a siam thin . State fund atanga sum hmuh a harsat vangin maintenance hna a thawh fumfe theih lohva, sum hmuhna dap chawp a ngai thin a ni," a ti.

Tunhnaia mipui lamin an complain ber, OPC leh seal coat chungchanga Contractor lam chuan beisei loh deuh hmanraw hman tur an khaihlak thut vanga harsatna nei ta ni a insawin, a tha thei ang bera tih an tum thu an sawi a. Kawng chhuat pah hnuaihning-in a tlin bak Kawngpui zau zawnga tih len belh chu a tlo dawn loh avangin Estimate a tel lo, Passing place pawh hmun remchang laiah siam a nih theih nan YMA te chu hmun remchang lo chhinchhiah ) turin an ngen zui bawk.

Hetih rual hian mipui sawiselna pakhat, nikum lama siam tawh hmun thenkhat lo chhe leh tawh siam tura YMA lamin an nawrna chu, Contractor te chuan an hna kal lai mek thawh zawh hunah an siam leh nghal tur thu an sawi bawk. Contractor te hian Kum khat leh a chanve dang he kawng hi an enkawl zui dawn bawk a ni.

(RD Darthanzauva Mamit PTC)

<><><>

## **HEALTHY LUNGLEI CAMPAIGN**

Healthy Lunglei District Campaign hnuai sawrkar leh Mizoram Thal Kristian Pawl (MTKP) tang kawpin hriselna inzirtir tura thawh hona an kalpui mekah nimin khan Lunglei DC Conference Hall-ah Lunglei khawpui huam chhunga Thal Kristian Pawl (TKP) pastor bial pathum - Bazar, Raahsiveng leh Theiriak hnuai unit hrang hrang 14-a TKP hruaitute tan inkai chhawn theih loh natna (Non-Communicable Disease - NCD) chungchang inzirtirna, 'sensitisation programme' buatsaih a ni.

He hun hi Lunglei Sub-Deputy Commissioner Pi Lalhlimpui Pachau chuan a kaihuai a. District Immunisation Officer Dr Christina Zonunmawii chuan natna inkai chhawn theih loh (NCD) chungchang, a awmzia, a natna lan chhuah dan leh natna lo awm chhan bakah, NCD natna laka inven dan tur kawng hrang hrangte a zirtir a. Thalaite'n nunphung hrisel an neih theihna tura hma lak dan tur kawng hrang hrangte zir ho leh sawi ho a ni bawk.

Healthy Lunglei District Campaign hnuai sawrkar leh Mizoram Thal Kristian Pawl (MTKP) tang kawpin hriselna inzirtir tura thawh hona an kalpui mekah pastor bial TKP pathum - Bazar, Raahsiveng leh Theiriak bial leh an hnuai unit 14 te chu thlan niin, thalai programme-ah a remchan danin hriselna lam hawi inzirtirna leh thil tih - zingara kea kal, thla kipa infiamna hun huaihawt, kohhran/TKP chanchinbu leh social media kal tlanga hriselna lam hawi inzirtirna puanzar, member-te hriselna dinhmun endik, inzirtirna thuziak sem darh, intlansiak, thu inziahsiak leh hma lakna remchang ang ang an kalpui mek a. Natna inkai chhawn theih loh chungchanga awmze nei leh hlawk zawka hma an lak zel theih nan TKP hruaitute tana sensitisation programme hi buatsaih a ni.

**(PR)**

<><><>

## **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawin chawhnu dar 2 leh a chanve-ah Chanchinthar hi puan leh a ni ang.

<><><>

## **ALL PARTY MEETING**

Parliament Budget Session chu wawin hian tan a ni dawn a. President Draupadi Murmu-i chuan wawin session tanniah Lok Sabha leh Rajya Sabha member thukhawm hmaah thu a sawi ang a. Naktukah Union Finance Minister Nirmala Sitharaman-in Union Budget a pharh ang.

Nimin khan Budget Session lo awm tur pualin sawrkar chuan political party tin aiawh inhmuhkhawm a ko a. He hunah hian Union Minister zingah Defence Minister Rajnath Singh, Health Minister JP Nadda, Parliamentary Affairs Minister Kiren Rijju te bakah Congress MPs Jairam Ramesh leh Gaurav Gogoi te, TMC MP Sudip Bandyopadhyay, Samajwadi Party MP Ram Gopal Yadav, BJD MP Sasmit Patra,leh DMK MP T.R. Baalu te pawh an tel a ni. He inhmuhkhawmah hian sawrkar chuan Parliament rorel inkhawm tuang taka hman anih theih nan thawhpuih Political Party tin hotute a sawm a ni. Inhmuhkhawm zawh hian New Delhi-ah chanchinbumite kawmin Union Parliamentary Affairs Minister Kiren Rijju chuan bill 16 leh business 19 ziahluh tawh a ni a ti bawk.

(Newsonair)

<><><>

## US

US-a khualzin 60 phur thlawhna leh sipai helicopter insu avangin thlawhnaa chuang zingah dam chhuak an awm lo niin US President Donal Trump chuan a sawi. Washington-a Potomac luh thlawhna hi tlain ruang 28 hmuh a ni tawh a. Washington DC-a Reagan National Airport-ah US Army Black Hawk helicopter leh khualzin phur thlawhna te chi hi boruaka an awm lain an insu a. Thlawhna tlankawng runway hnaih takah vanduinah hi a thleng niin Federal Aviation Administration chuan an sawi a. Khualzin phur thlawhna hi Kansas atanga Washington rawn pan niin a chhungah mi 60 leh thawktu 4 an chuang a. Helicopter hi training lai khalh niin sipai pathum an chuang a ni.

(Newsonair)

<><><>

## NATIONAL GAMES

Uttarakhand-a National Games vawi 38-na neih mekah inelna hrang hrangte tuang takin a kal a. Nimin khan 10m air rifle ah Tamil Nadu mi Naramad Nitin Raju chuan gold medal a la a. 25m rapid fire pistol ah Haryana atangin Aneesh chuan gold a la bawk a ni. Cycling ah Karnataka atangin Naveen Thomas John leh Maharashtra mi Pooja Baban Danole ten gold an la bawk a ni. Karnataka chuan medal lak tamah hma an hruai mek a, Manipur chuan dawtin Maharashtra chu pathumna an ni. Kan corr report ilo ngaithla ang u.

(VC)

(Newsonair)

<><><>